

保德州志

縣長萬泉馬蕃庶總裁

郡人 張寅樞 襄助

郡人 王贊堃 襄助

郡人張念祖經理

郡人王永明校對

聖澤第五

殷夢高曰天無私覆地無私載日月無私照王者奉三無私以宰制一區宇雖阻深闇味猶使得耀乎光明況禹跡所掩五服之內尺土一民莫非其有而湛恩濫澤顧獨有遺焉者乎保德自唐虞以來世列版圖春秋之季暫為林胡樓煩所據不久旋復斯民食毛踐土享累朝之樂利者歷三千餘祀矣其間救災卹患褒德錄功或遊豫而施恩或攘外以安內即世遠蹟湮文殘獻缺而間有史傳未泯見聞可歷者一政一事何莫非宵旰之憂勤雨露之宏施耶至我本朝聲教四訖內

保德州志

卷五 聖澤

一

外一家而聖德巍巍仁漸義摩更有存神過化度越千古者又安可不急為掄揚以當歌頌於萬一哉作聖澤志

巡幸五之一

宸翰五之二

漕輓五之三

蠲賑五之四

武功五之五

廟算五之六

旌表五之七

貶封五之八

爵命五之九

贈卹五之十

襲廕五之十一

養老五之十二

巡幸

大禹 禹貢導河積石至於龍門註引李復之說云禹鑿龍門起於唐張仁愿所築東受降城之東自北而南至同州韓城北安國嶺而盡按積石在今陝西臨洮府河州東受降城即漢雲中郡地在今山西大同府城西北龍門山在今陝西西安府韓城縣與山西平陽府河津縣相接觀此則州境一百四十里之河皆禹所疏鑿也禹之至此明矣

秦始皇 相傳始皇巡狩至此今州東南八十里猶有巡狩時所踐馬蹄在石上詳見古蹟

漢薄太后 相傳州西花園寨爲薄太后看花處其上有御道塢豈文帝龍潛守籓於代去此不遠或時侍太后遊幸於此築輦道後人遂以御道名其塢歟且河曲

保德州志

卷五 聖澤

二

又有娘娘太子等灘則故老傳聞或不誣也詳見古蹟

北魏高祖 宋明帝泰始元年魏興安十三年二月魏主如樓煩宮

今上康熙三十六年二月 上出京自大同由河保一路至寧夏親督師征噶爾丹

二十八日臨幸保德州唐文德率合州紳衿耆老迎鑾於郭家灘五里舖是日車駕由東門入城駐蹕於生員陳士宣家二十九日 上御龍船由鉄匠舖同

皇長子臨河捕魚隨獲金色鯉二尾知州唐文德又進活魚 上命收并進梨園

允令供奉初一日黎明 命兵部同鴻臚寺祭河已刻啓行 賜陳士宣白金十兩知州唐文德 御書一幅由南關出至康家灘渡河合州官民送至河濱兒童

爭挽 上船 上大悅各 賜銀有差少頃過河結營府谷士庶猶瞻仰 御幄踴躍高呼稱亘古未有云

宸翰

元

勅加封 先師孔子詔

成宗皇帝

蓋聞先孔子而聖者非孔子無以明後孔子而聖者非孔子無以法所謂祖述堯舜
憲章文武儀範百王師表萬世者也朕纂承丕緒敬仰休風循治古之良規舉追封
之盛典加號 大成至聖文宣王遣使闕里祀以太牢於戲父子之親君臣之義永
惟聖教之尊天地之大日月之明奚馨名言之妙尙資神化助我皇元

明

御製敬一箴

夫敬者存其心而不忽之謂也元后敬則不失天下諸侯敬則不失其國卿大夫敬
則不失其家士庶人敬則不失其身禹曰后克艱厥后臣克艱厥臣五子之歌有云
予臨兆民如朽索之馭六馬爲人上者奈何不敬其推廣敬之一言可謂詳矣一者
純乎理而無雜之謂也伊尹曰德惟一動罔不吉德二三動罔不凶其推廣一之一
言可謂明矣蓋位爲元后受 天付託承 天明命作萬方之君一言一動一政一

保德州志

卷五 聖澤

三

令實理亂安危之所繫若此心忽而不敬則此德豈能純而不雜哉故必聽民畏天
格郊禋祀之時儼神明之鑒享發政臨民端莊戒謹惟恐拂於人情至於獨處之時
思我之咎何如改之不各思我之德何如勉而不懈凡諸事至物來究夫至理惟敬
是持惟一是協所以盡爲 天之子之職庶不忝厥 祖厥 親由是九族親之黎
民懷之仁澤覃及於四海矣朕以冲人纘承丕緒自諒德惟寡昧勉而行之欲盡持
敬之功以馴致乎至德其先務又在虛心寡慾驅除邪逸信任耆德爲之匡輔敷求
哲人布列庶位斯可行純王之道以坐致太平雍熙之至治也朕因讀書而有得焉
乃述此以 勗云

人有此心

萬里咸具

體而行之

惟德是

敬焉一焉

所當先務

匪一弗純

匪敬弗聚

元后奉天

長此萬夫

發政施仁

期保鴻圖

敬怠純駁

應驗頓殊

徵諸天人

如鼓荅桴

朕荷天眷	爲民之主	德或不類	以爲大懼
惟敬惟一	執之甚固	畏天勤民	不違寧處
曰敬維何	怠荒必除	郊則恭誠	廟嚴孝起
肅於明廷	慎於閒居	省躬察咎	儆戒無虞
曰一維何	純乎天理	弗參以三	弗貳以二
行顧其言	終如其始	靜虛無欲	日新不違
聖賢法言	備見諸經	我其究之	擇善必精
左右輔弼	貴於忠貞	我其任之	鑒別必明
斯之謂一	斯之謂敬	君德既修	萬邦則正
天親民懷	永延厥慶		
以下文缺			

國朝

保德州志

卷五 聖澤

四

今上御製訓飭士子文

國家建立學校原以興行教化作育人才典至渥也朕臨馭以來隆重師儒加意庠序近復慎簡學使釐剔弊端務期風教修明賢材蔚起庶幾械樸作人之意乃比來士習未端儒效罕著雖因內外臣工奉行未能盡善亦由爾諸生積錮已久猝難改易之故也茲特親製訓言再加警飭爾諸生其敬聽之從來學者先立品行次及文學學術事功源委有叙爾諸生幼聞庭訓長列宮牆朝夕誦讀寧無講究必也躬修實踐砥礪廉隅敦孝順以事親秉忠貞以立志窮經考義勿雜荒誕之談取友親師悉化僑盈之氣文章歸於醇雅母事浮華軌度式於規繩最防蕩軼子衿佻自昔所譏苟行止有虧雖讀書何益若夫宅心弗淑行已多愆或蜚語流言脅制官長或隱糧包訟出入公門或唆撥姦猾欺孤凌弱或招呼朋類結社要盟乃如之人名教不容鄉黨弗齒縱倖逃褫扑濫竊章縫返之於衷能無愧乎况乎鄉會科名乃掄才大典關係尤鉅士子果有真才實學何患困不逢年願乃標榜虛名暗通聲氣夤緣

詭遇罔顧身家又或改竄鄉貫希圖進取囂凌騰沸網利營私種種弊端深可痛恨且夫士子出身之始尤貴以正若茲厥初拜厭便已作姦犯科則異時敗檢踰閑何所不至又安望其秉公持正爲國家宣猷樹績膺後先疏附之選哉朕用嘉惠爾等故不禁反復惓惓茲訓言頒到爾等務共體朕心恪遵明訓一切痛加改省爭自濯磨積行勤學以圖上進國家三年登造束帛弓旌不特爾身有榮即爾祖父亦增光寵矣逢時得志寧俟他求哉若仍視爲具文玩愒勿做毀方躍冶暴棄自甘則是爾等冥頑無知終不能率教也既負栽培復干咎戾王章具在朕亦不能爲爾等寬矣自茲以往內而國學外而直省鄉校凡在學臣師長皆有司鐸之責者並宜傳集諸生多方董勸以副朕懷否則職業弗修咎亦難追勿謂朕言之不預也爾多士尙敬聽之哉

今上御製先師孔子贊

清濁有氣剛柔有質聖人參之人極以立行著習察舍道莫由惟皇建極惟后綏猷

保德州志

卷五 聖澤

五

作君作師垂範萬古曰惟堯舜禹湯文武五百餘歲至聖挺生聲金振玉集厥大成序書刪詩正禮定樂既窮象繫亦嚴筆削上紹往緒下示來型道不終晦秩然大經百家紛紜殊途異趣日月無踰美墻可晤孔子之道惟中與庸此心此理千聖所同孔子之德仁義中正秉彝之好根本天性庶幾夙夜最哉令圓溯源洙泗景躅唐虞載歷庭除式觀禮器擒毫仰贊心焉遐企百世而上以聖爲歸百世而下以聖爲師非師夫子惟師於道統天御世惟道爲寶太山巖巖東海泱泱高萬仞夫子之堂孰窺其藩孰窺其徑道不遠人克念作望

顏子贊

聖道早聞天資獨粹約禮博文不遷不貳一善服膺萬德來萃能化而齊其樂一致禮樂四代治法兼備用舍行藏王佐之器

曾子贊

洙泗之傳魯以得之一貫曰唯聖學在茲明德新民止善爲期格致誠正平以推至

德要道百行所基纂承統緒修明訓辭

子思子贊

於穆天命道之大原靜養動察庸德庸言以育萬物以贊乾坤九經三重大法
是存篤恭慎德成德之門卷之藏密擴之無垠

孟子贊

哲人既萎楊墨昌熾子輿聞之曰仁曰義性善獨聞知言養氣道稱堯舜學屏功利
煌煌七篇並垂六藝孔學攸傳禹功作配

閔子贊

天經地義孝哉閔騫父母昆弟莫間其言汙君不事志氣軒軒復我汶上出處休焉

仲弓贊

懿德賢行有一則尊子也履之成性存存駢角有用犁牛莫論刑政之言惠施元元
子貢贊

保德州志

卷五 聖澤

六

謙德知二器實瑚璉動必幾先孰並其辨一使存魯五國有變終相其主譽處遊遠

仲由贊

升堂惟先千乘惟權陵暴知非委實可賢折獄言簡結纓禮全惡言不耳仲尼賴焉

子夏贊

文學二目名重一時爲君子儒作魏侯師不可後禮始可言詩假蓋小嫌聖亦不庇
伯牛贊

德以充性行以澡身二事在躬日躋而新並驅賢科得顏與隣不幸斯疾命也莫伸

宰我贊

辨以饒許言以致文苟弗執禮宜莫釋紛朽木糞墻置不足云言語之科燁然有問
冉求贊

循良之要在於有政可使爲宰千室百乘師門育材治心扶性退則進之政磨之柄

子游贊

道義正已文學擅科爲宰武城聯以絃歌割雞之試牛刀謂何前言戲耳博約則多子張贊

念音顛孫商德與隣學以于祿問以書紳參前倚衡忠信是尊色取行違作戒後人

漕輓

夏

禹貢浮于積石至於龍門西河 註雍州之貢道有二其東北則自積石至於西河按積石在今臨洮府河州西河冀之西河今山西一帶河皆是觀此則天橋峽口水道雖險自虞夏以來固已久通舟楫爲飛芻輓粟之露矣

元

世祖至元十二年六月命安王府椽史僕散翰之等於黃河水運大木自積石山至天橋子前至長安詳見古蹟明

世宗嘉靖十一年六月御史徐汝珪請漕石州保德之粟自黃河而上達于延綏

保德州志

卷五 聖澤

七

以寔邊儲

懷宗崇禎三年七月御史黃道直請發餉銀易米一從保德州河路一從洛宜陸路往陝西賑給飢民

國朝

康熙三十年冬命郎中囊吉理布泰等督運大同府大有倉米賑濟陝西至三十一年三月運至米十三萬石零共船四十八隻從湖灘河起至潼關止本州知州高起鳳護送往返共五閱月

蠲賑

明

太祖洪武二年正月詔免山西等處今年稅糧

十三年詔還山西軍二萬四千人爲民

宣宗宣德三年三月山西民饑流至河陽等處有司捕逐上聞命遣官往山西河南

賑濟禁捕治八年四月山西
早詔賑恤之

武宗正德五年准本州貢生張綬奏免本州糧草起運偏關俱存留本州支用
神宗萬曆二十年知州韓朝貢以本州河濱地被水衝沒申減本色折色糧共八十
一石有奇

萬曆四十二年知州胡栴以本州雹災申請賑谷五百餘石又申免本州水災蠲除
未盡草站銀共一十六兩五錢零

懷宗崇禎八年准本州鄉紳王邵奏請蠲除鹽票一千五百餘張七年三月山陝
大饑民相食發金五萬賑之

崇禎十三年四月上以兩京及山東山西各處告饑命地方有司設法賑濟招撫流
移撫按官躬行州縣課殿最以聞

國朝

世祖順治八年奉旨蠲免傷亡丁徭銀共一百八十五兩

保德州志

卷五 聖澤

八

今上康熙四年以旱潦相仍奉旨蠲免本年錢糧廢帑賑濟

康熙十九年大同太原二府旱荒奉巡撫前任土又繼任穆設法勸賑先動借帑銀
後題請抵補奉 旨允行自六月至九月散給米谷九月至二十年二月煮粥賑

饑二十年三月至五月復給散米壹每月大口支一斗二升米一分壹三分小口
折半支給每倉斗米一錢八分壹一錢二分照時價給發銀錢本州知州許國柱
先捐銀一百零一兩後本府奉憲又發下銀一百兩共煮粥賑過饑民半年約口
四萬二千二百有奇先後買米八十石暨煤炭等項用過銀二百一兩零又申報
二十年二月後待賑饑民大口小口極貧次貧共二萬三千七百五十七名

康熙二十二年二月巡撫穆因十九年荒旱題請緩徵奉旨開徵緩至六月

二十二年巡撫穆題請開豁逃亡丁糧本州共銀三百八十四兩三錢零奉旨蠲免
三年至二十四年起徵

二十八年以歲荒穀貴奉旨蠲賑

三十六年二月 聖駕西巡臨幸太原府屬崑嵐河曲保德三州縣地方奉昏照大同府一體蠲免現年錢糧

武功

周

赧王八年趙武靈王略地西至河登黃華之上黃華黃河側之山名九年西略胡地至榆中林

胡王獻馬十六年武靈王自號主父十九年主父行新地遂出代郡遇樓煩王於

西河而致其兵其後大破林胡樓煩築長城自代並陰山下至高關為塞置雲中

鴈門代郡

秦

始皇三年趙悼襄王復起李牧為將守北邊匈奴單于率眾來入牧多為奇陣張張

左右翼擊之殺匈奴十餘萬騎滅襜褕班書作滹林破東胡降林胡單于奔走十餘歲

不敢近趙邊

保德州志

卷五 聖澤

九

魏

明帝青龍元年鮮卑軻比能子將千餘騎迎保塞鮮卑度步根部落出塞與并州將

蘇尙杜弼戰于樓煩二將敗沒帝遣驍騎將軍秦郎將中軍討之軻比若走別部

泄歸泥率眾來降

隋

文帝仁壽四年漢王諒反代州總管李景發兵拒諒諒遣其柱國喬鐘葵自嵐州出

鴈門攻之景且戰且走大敗葵兵

恭帝義寧元年三月馬邑人劉武周殺太守王仁恭附於突厥襲破樓煩郡進取汾

陽宮 唐高祖武德三年秦王世民討殺之

唐

元宗開元九年張說將步騎萬人出嵐州合河關擊叛胡黨頃大破之

周

世宗顯德元年比漢憲嵐等州降周

宋

太祖開寶四年北漢憲州判官史昭文嵐州刺史趙文度各以城降

真宗景德元年契丹入寇嵐武保德諸軍高繼祖擊敗之

金

袁宗正大間元將速不臺寇保德忠孝軍總領完顏陳和尚按陳和尚本名彝字良佐和尚其小字也與戰於倒迴谷口大敗之

明

太祖洪武三年五月元宗室四大王初結岩於靜樂岢嵐山中至是率眾寇武州太原指揮程桂等擊敗之追至龍尾庄四大王遁走獲其三大王脫忽的帖木兒送京師

懷宗崇禎三年正月陝西流賊王嘉胤陷府谷窺伺河保一帶地方知州王國珪鄉

保德州志

卷五 聖澤

十

紳王邵併力拒守八月山西巡撫宋統殷率師恢復府谷嘉胤佯乞降仍奪路走黃甫川十月復陷府谷十一月又陷河曲四年正月再渡河掠菜園溝孤山副總兵曹文詔擊却之四月文詔等復河曲六月擊斬嘉胤于陽城

國朝

世祖順治七年守備牛化麟殺知州徐效奇據城與府谷賊高有才互相犄角應大同叛將姜勳朝命大將固山額真墨名缺等攻誅之

康熙十四年陝西賊朱龍黨羽周四據府谷將犯河保一路知州李遇時等協心守禦城賴以全後大兵滅賊各獲優叙知州李遇時陞知府守備苗有年陞都司吏目錢萬芳陞主簿幕客朱旦即授知州

康熙三十六年口外部落厄魯特噶爾丹擾亂邊塞 御駕親征從大同至太原府

屬河曲保德一路地方進指寧夏諸將協勦滅之

廟算

晉

孝武帝太元元年秦王苻堅伐代分其民為二部河以東屬劉庫仁以西屬鈇弗衛辰

唐

太宗貞觀十九年十二月發朔并汾箕嵐代等九州兵命江夏王李道宗統領備薛延陁

元宗天寶元年正月置河東節度使與朔方 角統天兵大同橫野岢嵐四軍備禦突厥

明

景帝景泰元年五月也先分道入寇山西巡撫朱鑑奏請關隘諸將畫地救援寇犯河曲保德岢嵐宜令偏頭關策應犯寧化靜樂等處宜令山西營策應犯五臺繁峙等處宜令鴈門關策應其石州寧鄉等處宜令汾州營守備協守從之

保德州志

卷五 聖澤

十一

景泰元元年四月諜報也先追石亨於鴈門烽火連屬衆請發兵救援兵部尚書于謙上方略授石亨使皆堅壁而令各營秣馬厲士若將大舉者仍令延綏總兵師渡河於保德州設伏截殺從之

旌表

宋

義門趙寧 英宗治平二年以知府州折繼祖并知本州張堂等奏寧十世同居事奉旨旌表居前樹綽楔門賜牌一面上書勅賜旌表門閭趙氏八大字門外左右各築土臺高一丈二尺用白色粉飭其門牆兩行又各栽樹木成林至今碑記猶存

明

烈女陳氏 熹宗天啓三年巡按御史徐公名缺以烈女未嫁死夫事上聞奉旨建坊旌表五年巡按御史劉公四名端又立祠祀之顏其上曰陳貞烈廟詳見傳及碑記

貶封

元

狄元昌

以孫東山貴贈中順大夫兵部侍郎上騎都尉追封天水郡伯

狄琮

以子東山貴贈封如其官以上俱詳見鄉賢

明

戴冕

以孫延春貴誥贈詳見武官

戴辰

以子延春貴誥贈詳見忠臣

崔珙

以子士成貴勅贈文林郎戶部雲南司主事

陳來

以孫奇瑜貴贈中憲大夫河南布政

姜維屏

以子名武貴誥贈驃騎將軍

陳嘉蓋

以子奇瑜貴誥封大中大夫河南布政使司左叅政

王所用

以子邵貴勅贈徵仕郎翰林院檢討以上俱詳見貢生

保德州志

卷五 聖澤

十二

國朝

劉際亨

以子毅貴誥封奉政大夫刑部郎中詳見貢生

陳永祚

以子大謨貴勅贈文林郎四川慶符知縣

姜宗呂

以子儒貴勅贈文林郎行人司行人又誥贈中憲大夫鴻臚寺少卿詳見進士

姜栩

以子弘燦貴誥贈武德將軍

爵命

宋

起寧

英宗治平中誥授果國郡伯

明

戴延春

神宗萬曆三十年誥授驃騎將軍鎮守山東登萊等處總兵官

崔士成

萬曆間勅授文林郎雲南司主事

陳奇瑜

懷宗崇禎初誥授中憲大夫河南布政司左布政

王 邵 崇禎十年勅授徵仕郎翰林院檢討
韓友范 崇禎間勅授奉政大夫陝西慶陽府知府

國朝

劉 穀 康熙初勅授奉政大夫刑部郎中

王宗本_{子邵} 康熙二十三年勅授文林郎大興縣縣丞

姜 櫛 康熙三十八年誥授中憲大夫鴻臚寺少卿

姜弘燦 康熙間勅授武德將軍平魯衛守備

贈卹

明

戴 辰 以豐阜城戰歿追贈明威將軍指揮僉事

徐堯臣 以禦北寇陣亡卹錄陞副千戶

錢 棟 以禦北寇陣亡贈都督指揮僉事

保德州志

卷五 聖澤

姜名武 以朱仙鎮勦賊戰死贈特追榮祿大夫後軍都督府右都督蔭一子孫以上俱見忠臣

萬世德 以征倭禦魯功特贈兵部尚書遣官諭葬詳見鄉賢

襲廕

明

孫 茂 原籍嘉興副千戶盛之後宣德八年襲本所副千戶

曹 廣 原籍儀真太原中衛左所鎮撫成之後宣德間襲本所鎮撫

楊 萬 原籍如皋本所鎮撫宗之子正統年間襲

王 進 原籍盱昭太原左衛中所百勝之後父智殺賊偏關有功陞副千戶天順末

劉 勣 本所百戶浩之子正德間襲以征流賊功陞署副千戶

錢 浩 本所正千戶山之子嘉靖初年襲

李繼芳 本所正千戶忠之孫嘉靖間襲

王天麟 本所副千戶進之孫嘉靖間襲

徐堯臣 本所百戶義之子嘉靖間襲

楊永 本所鎮撫萬之孫以祖陣亡加陞副千戶世襲

劉懷忠 本所署副千戶勛之子萬曆初年襲

孫光胤 本所副千戶茂之孫萬曆初年襲

楊世卿 本所副千戶永之孫萬曆二十一年襲本所百戶

張楷 所人萬曆二十四年以功陞百戶世襲詳見武官

徐維忠 本所百戶堯臣子萬曆二十九年襲

劉興漢 懷忠姪萬曆二十八年襲

曹三元 本所鎮撫廣之七世孫萬曆三十五年襲

趙登高 本所百戶忠之孫萬曆三十九年襲

王化顯 本所百戶景之孫萬曆間襲

孫揚 本所副千戶光胤之子萬曆四十一年襲

保德州志

卷五 聖澤

十四

安邊才 所人百戶世襲詳見武官

萬化孚 贈兵部尚書世德冢子承襲祖職指揮僉事由寧武守備歷陞河保營偏關陝西神木叅將加副總兵銜以上世襲

萬邦孚 世德次子以平倭功應官生以善後及薊鎮紅草溝殺賊功歷應錦衣衛正千戶世襲

萬有孚 世德叔子以覃恩應三品官生授戶部照磨

萬國孚 世德季子以勞瘁王事應二品恩生

陳永祚 五省總督奇瑜子以父勦流寇功應兵部官監

姜宗呂 贈都督名武子以父殉難陣亡應錦衣衛百戶未任 以上恩應

養老

康熙二十八年二月恩詔優給老人毋論軍民年七十以上者許一丁侍養免其雜派差役八十以上者賜絹一疋綿一斤米一石肉十斤九十以上者倍之至百歲者題明給與建坊銀兩本州報過老人共二百九十九名內七十以上者張可中等二百五十五名八十以上者武應洽等四十二名九十以上者張才清等二名

知州高起鳳各照例優給百歲者無

四十二年三月又奉恩詔優給老人如前例本州報過老人共三百七十一名內七十以上者董維國等二百一十名八十以上者張奉明等一百五十四名九十以上者陳友興等七名知州唐文德亦各照例優給百歲者無

四十八年五月又奉恩詔優給老人如前例本州報過老人共三百七十名內七十以上者傅弘禧等一百九十一名八十以上者張應奎等一百七十一名九十以上者郝有才等八名知州王克昌亦各照例優給百歲者無